



**Majlis Ugama Islam Singapura**

**Khutbah Jumaat**

**15 April 2016 / 7 Rejab 1437H**

**Ibadah Membentuk Sikap Rendah Diri**

الْحَمْدُ لِلَّهِ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ بَشِيرًا وَنَذِيرًا  
وَدَاعِيًا إِلَى اللَّهِ بِإِذْنِهِ وَسِرَاجًا مُنِيرًا وَأَشْهَدُ أَنْ لَا إِلَهَ إِلَّا اللَّهُ  
وَحْدَهُ لَا شَرِيكَ لَهُ وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ  
وَصَفِيُّ اللَّهِ مِنْ خَلْقِهِ وَحَبِيبُهُ إِمَامُ الْأَنْبِيَاءِ وَسَيِّدُ الْمُرْسَلِينَ اللَّهُمَّ  
صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا.  
أَمَّا بَعْدُ فَيَا عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ  
مُسْلِمُونَ

Sidang Jumaat yang dirahmati Allah,

Marilah kita tingkatkan ketakwaan kepada Allah s.w.t.

Perbaharuilah azam kita untuk menuruti segala perintah Allah

s.w.t dan menjauhi laranganNya. Semoga dengan ini, ia akan

memperindahkan lagi akhlak dan peribadi kita, serta

memperkukuhkan iman kita kepada Allah s.w.t.

Saudaraku sekalian,

Khutbah telah membincangkan kepentingan sifat merendah diri dalam memperbaiki hubungan dengan Allah dan sesama manusia. Pada minggu ini saya ingin mengajak kita merenung semula bagaimana ibadah seharian kita juga boleh mendidik jiwa agar tidak dikuasai kesombongan. Bahkan bagaimana ia dapat membangun dalam diri kita keinginan untuk terus menambah kebaikan dan memperbaiki diri kita.

Saudaraku, sekiranya kita perhatikan amal ibadah yang kita laksanakan setiap hari sebenarnya dapat membentuk dan menerapkan sifat rendah diri serta menghapuskan sikap angkuh dan keakuan.

Salah satu ibadah tersebut adalah ibadah solat. Sebagai contoh; di saat seorang hamba mengangkat kedua belah tangannya untuk bertakbir, pada saat itulah segala yang beliau miliki sama ada harta, kedudukan, pekerjaan, kepandaian dan kemahiran hendaklah ditinggalkannya, kerana pada ketika itu beliau sedang berhadapan dengan Al-Malik (Tuhan Pemilik segalanya) dan pada saat itu gerak geri beliau sama ada bersifat rohani ataupun jasmani sedang menghayati ungkapan lafaz:

قُلْ إِنَّ صَلَاتِي وَنُسُكِي وَمَحْيَايَ وَمَمَاتِي لِلَّهِ رَبِّ الْعَالَمِينَ

Yang bermaksud: *Katakanlah: Sesungguhnya sembahyangku dan ibadatku, hidupku dan matiku, hanyalah untuk Allah Tuhan yang memelihara dan mentadbirkan sekalian alam. [Surah al-An'am ayat 162]*

Contoh selanjutnya, tatkala seseorang hamba sedang melakukan sujud, tubuhnya jatuh rebah ke bumi, dalam keadaan rendah diri, lidahnya melafazkan:

سُبْحَانَ رَبِّيَ الْأَعْلَىٰ وَبِحَمْدِهِ

Yang bermaksud: *“Maha suci Tuhanku yang Maha Tinggi dan dengan segala kepujianNya”*.

Saudaraku,

Oleh kerana itu, hendaklah kita banyak bersyukur kepada Allah. Apabila kita menerima sebarang nikmat ataupun penghargaan dan pujian, jangan lupa untuk basahkan lidah kita dengan kalimat seperti (*Hadza min fadhli Robbi*) atau (*masya Allah la quwwata illa billah*).

Semua ini tidak lain dan tidak bukan hanyalah untuk mengingatkan diri kita agar tidak menyombong diri dan melupakan sumber segala kenikmatan dan pujian itu adalah datang dari Allah s.w.t yang bersifat Al-Razzaq.

Saudaraku,

Selain itu, kita juga dituntut untuk merendahkan diri kepada kedua ibu bapa, ini bertujuan antara lain agar kita tidak menjadi orang yang melupakan jasa baik orang lain. Menjadi orang yang mensyukuri jasa orang kepada kita dan sekaligus agar tidak menjadi orang yang sombong dan tidak menghargai sumbangan orang terhadap diri kita.

Nabi s.a.w. bersabda dalam hadith yang bermaksud: *“Barangsiapa yang tidak berterima kasih kepada manusia maka dia tidak bersyukur kepada Allah”*. [Hadith riwayat Ahmad]

Tuntutan ini juga sekaligus mengingatkan betapa kita ini lemah dan memerlukan kepada bantuan orang lain demi untuk kita dapat melaksanakan kehidupan dengan baik dan selesa. Ini mengingatkan kita bahawa kita dulu juga suatu ketika dalam keadaan memerlukan dan lemah, namun Allah mengurniakan kepada kita nikmat keluarga dan ibu bapa yang mencurahkan kasih sayang, menjaga, merawat dan membesarkan kita. Jangan lupa titipkan buat mereka di setiap solat kita:

رَبِّ اغْفِرْ لِي وَلِوَالِدَيَّ وَارْحَمْهُمَا كَمَا رَبَّيَانِي صَغِيرًا

Yang bermaksud: *“Wahai tuhanku, ampunkan dosa ku dan dosa kedua orang tuaku, dan rahmatilah mereka berdua, sebagaimana mereka dahulunya mendidikku ketika aku kecil.”*

Apabila kita sudah mampu berdikari, janganlah kita berlagak sombong. Bantulah mereka yang memerlukan bantuan seperti mana Allah pernah mendokong pembangunan kita ketika kita memerlukan. Untuk tujuan itu juga, Allah mendidik kita agar bersedekah dan berzakat dan berkongsi kelebihan nikmat yang Allah anugerahkan kepada kita.

Saudaraku,

Seperti mana kita ini diingatkan agar bersyukur di atas nikmat Allah s.w.t. saya juga ingin mengingatkan bahawa kita sudah berada di bulan Rejab. Bulan yang mulia ini merupakan salah satu diantara 4 bulan “haram” di sisi Allah s.w.t. maka perbanyakkanlah amalan. Bulan Rejab bererti kita semakin hampir dengan bulan Ramadan, marilah kita pastikan kita bangunkan semangat untuk lebih giat beribadah dan berkhidmat untuk kebaikan semua. Semoga dengan kehadiran bulan Rejab yang mulia ini, Allah s.w.t. menerima segala amalan kita, serta kita dipanjang usia untuk bertemu Ramadan yang bakal berkunjung tiba. Amin Ya Rabbal Alamin.

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ  
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ  
الْعَلِيمُ، أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ  
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا  
فَوْزَ الْمُسْتَغْفِرِينَ وَيَا نَجَاةَ التَّائِبِينَ.